

Takurda-o Yahudas

Rem-se rọ n-me à:

M-zantẹ 1-2

Ur-she'et, ur-yoos un kom-de un yan-yoos-de
ut-bo ne 3-16

Eeg-o a ma'as m-sheer ne 17-23

Kon-se ur-buste 24-25

¹ Me, Yahudas, ko-guw Yeso **Kiristi**,* heno **Yakubu**. Me genbe ka takurda-o ha-mo un be-de un **yan-dor Yeso**. Me un genbe kap ye Shir daage wu was à, ye Shir o-Tato un ye Yeso Wan-Koyan rọ ur-'er ne à.†

² Um konog Shir, wu dootu no ur-'won, gwugwu-mo ur-hur, m-was ne.

Yoos-de ut-bo rọ m-hante ur-naas

³ No, ye me m-was un no ne à, um nomog ur-gop um genbutu no ma-to un ka gwu-o o mosse na à. Amba um hyanuru depete m-gen um dootu no jaab-o ut-men, um gaktu no 'er-de un m-sheer mo Shir bopse hun-ne ye un wu ye ba m-kukop, so o-gaan cot à. Depete a wen hun-ne baramse sheer-m na. ⁴ Me un rwor kaane remen ye ken hun-ne ye cowog be un no wukusse. Yett gyer-o Shir á. Ye rọ m-zee yar-mo Shir ya'ag na ur-keer a she'ette she'et-de ma saa. Kom-de un ka hun-ne rọ cas cas remen ye sha'ag Wan-Nap-us na

* **1:1** 1:1 Wu Shir daagne à. † **1:1** 1:1 Hyen komo: Mati 13:55; Mark 6:3.

cot, Wan-Koyan Yeso **Kiristi**. A nepste ka yo ro remen gense to ro n-me un Ma-to Shir cin n-ga.

⁵ Man baksu no, komo no nepse yo m-sok ne, ko de nomte Wan-Koyan ruute **Isra**-ne un dak-o o-**Masar** a, amba myet un kaane ne ha-mo ur-kom wu waragte wu hoomse ka ye yage m-sheer be-de un wu a.† ⁶ No baks komo un ka **yan-tom-ye Shir** ye ne, ye yage m-she'et un con-de un ye de ut-gwomo de Shir sagbu ye a. Amba ye yaguru be-de con-de un ye. Shir ru'uste ye un kur-o m-ke'et o o-comb. Wu ka'ag ye un kwom-to m-ke'et har da-o ba m-ta. Ye ro un 'er-de un ho-ur caari-de un piish ut-ma. ⁷ Tot-to ka no o-**Sodom** o-**Gomora** ne a, un bo-to ro rigimshe un to ne a, to daage cow-yo m-naase m-nom un go un rem-se o-as ne a. O-ra o a sabarse ka bo-to. To waragte rii-yo ur-yoos mosse un o-ra o ba m-ta ne o he rangse un yan-men-ut jaas-to a.§

⁸ Ka yan-yoos-de ut-bo ye, ka ye ro m-gwon un bo-se un ye a, ye ro m-nom un rem-se m-rwuk un wur-to un ye. Ye 'yarag beeb-de un gwomo-ut Wan-Koyan na, ye ro un yo'og-o un seps-mo un **yan-tom-ye Shir**. ⁹ Ko Mikayer, sek-wu wu un **yan-tom-ye Shir** wu yo'og **ko-Gwomo-wu un ya-ut-kot** a, (da-o ye ro us-ahone mosse ur-u **Mosa** ne a, wu ko-yan-tom-wu Shir wu nom hor-mo ut-reeb un nu-o jaas-o a). Amba wu zeeg, "Wan-Koyan-wu kangse wo!"* ¹⁰ Amba ka hun-ne ye ro un yo'og-o un rii-yo ye nape a, untu ut-

† **1:5** 1:5 Hyen komo: Rwuu 12:51; Qog 14:29-30. § **1:7** 1:7 Hyen komo: Taka 19:1-24. * **1:9** 1:9 Hyen komo: Dane 10:13,21; 12:1; Hyan 12:7; Kara 34:6; Zeka 3:2.

gūt ye rō tō rō m-nom rii-yo tō cone à, ba us-weer, gon ka rem-se he ye m-woot be-de o-sabre.

¹¹ Rii-yo ur-'won yo ye! Remen ye dorute cow-o **Keen**, wu hō heno-o un wu à. Ya ye rō untun ká net-wu Baram, ye rakste hun-ne remen ye kumut o-hwor. Komo untun ká net-wu Kora, ka ye he m-sabre remen zang-o un ye.†

¹² Da-o ka hun-ne ye, she'ete n-me un morog-ur nō de m-re m-was ne mō un Wan-Koyan, ya ye rō untun ut-ta'ar tō rō un kus o m-hō à, tō hat-o wō de'e se m-sabre à. Ye rott m-'e á. Hi un de un ye temb ye rō m-reegte. Ya ye rō untun zaan-mō un kem-o ba m-hō à, amba ba m-hō n-me. Ya-m-mor tō ut-ma amba ba m-hoks un rwunte un rii. Ya ye rō untun 'yo-se ba ur-mat da-o depe à. Ba mar-mō kukt-o ye mare cot á, har ma ye hu'usse gaw remen a mu'ussute ye us-geer ne. ¹³ Ká yan-yoos-de ut-bō ye rō m-nom rem-se m-'e. Ya ye rō untun jok-ye m-sa, ye rō m-ine o-zungo à, ye rō m-rwunte un kop-tō un hu remen koob-de m-'e mō un ye. Untun regen-ye rō ye rō ut-tuw ba ur-hi à, ye rō m-kaw o-comb o ba m-ta.

¹⁴ Enok, nomog caara-us ta'oor bō un mar-m **Adamu**, wu rworog ut-ma mosse un ka hun-ne ye ne unze, "Gwot nō, Wan-Koyan roon un yan-tom-ye‡ un wu ne, us-dugu ba ur-me'et.§ ¹⁵ Wu piishe hun-ne ye un hono o-dak ut-ma. Wu kute kap yan-yage un dor o Shir rii-yo ba ur-bon yo ye nome Shir à. Wu rwunte cas nu-o jaas-o, o **ya-ur-ba'as** yan-yage dor o Shir rwore mosse un

† **1:11** 1:11 Hyen komo: Taka 4:3-8; Qog 22:1-35; Qog 16:1-35.

‡ **1:14** 1:14 ut-Girik: ka ye ba m-kukop. § **1:14** 1:14 Hyen komo: Taka 5:18,21-24.

wu ne à." ¹⁶ Ka hun-ne ye de, ya-us-hwuhwug-ye, koyanda ye ro m-hyan un **ba'as-de** un ye ken ye. Gop-ur yo-de de ro barag-se un ye temb. Ye un raks un hun-ne un nu-o m-rerem remen ye reet ur-ho be-de un ye.

Nak ut-to

¹⁷ Amba no ye me m-was un no ne à, baks no rii-yo **yan-Tom Yeso** ye un Wan-Koyan na Yeso **Kiristi** rurū no à. ¹⁸ Ye rurute no unze, "Da-o ur-kom a nom ye ken hun-ne ye ya-ur-ar, ye ro m-con ye hoge rerem-mo un ye un ko yo ke cow-yo ba ur-bon yo à."* ¹⁹ Ye ka kane m-moka, ye ye komo ro no m-hante m-cakre, she'et-de un hi un de un ye ye rotte. Yett **Kukt-o Shir** á.

²⁰ Amba no, ye me m-was un ye ne à, ma'as no m-bo'ose un sher-m no mo un ba m-kukop. No senge us-kon bo **Kukt-o Shir** kutu no à. ²¹ She'et no un was-m Shir, ess no hi un no un was-mo Shir. She'et no kaane bo no un ur-'er de un 'won-ur Wan-Koyan na Yeso **Kiristi** de he no haante un hog-o ba m-ta à.

²² No ma'as un kute un ye sher-mo un ye ro das das à ur-'won. ²³ No gu ye ken ye, no ruutu ye n-me o-ra o un piish ut-ma. Ye ken ye ro kon ye no he hoge 'won-de un ye à, amba nom no ceen bo yea naas no un **ba'as-to** un ye á.

Kon-se ur-bongon

²⁴ Ur-bongon be-de wu ro ur-beeb ne wu wenet no m-he à. Wu komo he no m-heet be-de un wu de jiishe ur-bon à ba **ur-ba'as**, se o-zak. ²⁵ Be-de

* **1:18** 1:18 Hyen komo: 2Bit 3:3.

un wu komo m-seps, wu ro Shir un hon-de un wu **Wan-Gwu** na, ur-bongon un bu-o Yeso **Kiristi** Wan-Koyan na. M-seps, ur-beeb, ut-gwomo ne, to warag-ut ma un wu cin takan-de o-da, m-moka, un da-o ba m-ta ne komo! **Amin.**

ut-Hun New Testament

Hun-Saare: ut-Hun New Testament New Testament

copyright © 2017 Wycliffe Bible Translators, Inc.

Language: Hun-Saare

Contributor: WBT Central Zone

© 2017 Wycliffe Bible Translators, Inc. in cooperation with the Ut-Hun Bible Translation Project All rights reserved. The New Testament in ut-Hun (Eastern Dukawa)

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022

4b40cd80-7cb8-5d3d-8563-557f030f99d7